

INDYOHESHA-BIRAYI

Alegisi KAGAME

Interuro ibasohozaho aka gatabo.

Aka gatabo nagahimbye mu wa 1941-1942 gatanzwe bwa mbere muri 1949. Hariho abantu benshi bari barakwumvise, na n'ubu bagahora bakanyishyuzwa. Ni cyo kinteye kugatangaza, kugakorera icyapwaga rya kabiiri.

Aka gatabo kitwa **Indyohesha-birayi**: si jye wakise ntyo, ahubwo nari narakise **Izina ry'Ingurube**, kuko gahimbura umugendo w'**Amazina y'Inka**. Muzi ko Amazina y'Inka bisobanura **Ibyivugo by'Inka** (nk'uko mu Kirundi ibyo twita **ibyivugo** babyita **Amazina**).

Iyo Izina ry'Inka ari umuzinge (ari byo kuvuga: risatwemo imivugo myinshi), iyo mivugo yose isozwa n'ibango rimwe rukumbi rigumya kugaruka mu ndunduro ya buri muvugo. Iryo jambo rero rikitwa **impakanizi y'umuzinge**, nk'uko muri iri Zina ry'Ingurube haguma kugaruka Indyohesha-birayi. Iri bango rero ni impakanizi y'iri Zina ry'Ingurube.

Navuze ko jyewe nari narise aka gatabo "Izina ry'ingurube". Mbere yo kugatangaza najyaga ngatiza abantu ngo bagasome, bambwire icyo bagatekerezaho. Bamwe ndetse barakandukura, ariko bese bahitamo kukita **Indyohesha-birayi**. Mbibonye ntyo, nanjye ibyo abo bandi bari barihitanyemo, ngatangaza nkise Indyohesha-birayi.

Hariho ingingo ebyiri ngomba gusobanura:

1°. Ni ki cyanteye guhimba aka gatabo? Icyo gihe nari maze gushyikira Amazina y'Inka, n'ibyivugo n'ibisigo. Ngira rero agatekereze ko guhimba ikintu cyagira umugendo umwe na byo. Mbanza gufata mu mutwe Amazina y'Inka menshi, n'ibyivugo n'ibisigo, kugirango niyumvemo imitererwe yabyo, ndebe icyo nzahitamo gukurikiza. Aho bigeze niyumvisha ko inganzo ikwiriye ari iy'Amazina y'Inka. (**Inganzo** bivuga imihimbire, inzira bakurikiza mw'ihimba, kuko ibisigo n'ibyivugo n'Amazina y'Inka bifite amategeko anyuranye, kimwe ayacyo, ikindi ayacyo).

Namaze kubona rero ko Indyohesha-birayi ishimishije abayisomaga, numviraho ko nashyikiriye Inganzo y'Amazina y'Inka, nuko ntangira guhimba "**Umuririmbyi wa Nyiri-ibiremwa**," mu nganzo rero y'Amazina y'Inka.

2°. Ingingo ya kabiri rero; numvise benshi bambaza ngo: "Mbese Abatware wavuzemo, ndetse n'Umwami, ntibyabarakaje, ntibyabaguteranijho?" Ababivugaga batyo, bazarebe mu kandi gatabo kitwa **Iyo wiriwe nta rungu**. Bazasangamo **Ibisigo by'Ubuse** (ku mpap. 19-46).

Bene ibingibi rero si ugusebanyaga, kuko biba bizwi ko ibivugwamo bitigeze kubaho. Ahubwo biramenyerewe ko n'iyi nzira ari inganzo yo gusetsa, yo kumara irungu. Ahubwo ababivugwamo barabyumvaga bagaseka kimwe n'abandi. Kuko rero aka gatabo

kakurikizaga inganzo bamwe batamenyereye, ni cyo cyatumye mbanza gutangaza Iyo wiriwe nta rungu (mu wa 1959 na bwo), kugirango **Ibisigo by'ubuse** babanze bimare bamwe impungenge.

Icyitonderwa

Muri iri Zina ry'Ingurube, amabango amwe akurikiwe n'umubare uri mu gakubo, nk'iyi ngiyi (1), (2), (3), (4), n'ibindi. Igihe ugeze kuri bene uwo mubare, ujye ureba iyo numero mu ndunduro y'aka gatabo, kugirango urebe igisobanuro cy'iryo bango.

Butare ku wa 15 Gicurasi 1977

UMUVUGO 1

Ingurube iyoborwa n'abashumba bo mu Ngeyo

Rutihunza inzarwe y'isayo,
 Ingurube zahanitse imirizo,
 Rwa muturaga ku bijumba,
 Ni igikoroto cyo mu bikoko,
 5 Igira ibikobokobo by'ubukombe,
 Ikizihirwa isanga ibishanga,
 Ikizimba aho inzarwe iganje
 Ikahavurunga ijabo rikahava,
 Ikahacundagura bitaravugwa,
 10 Ikahavogereza ingurube nto,
 Ikahatengagura cyane
 Ngo iz'emicanda zihace,
 Ikahacogoza ihaconshoma,
 Ikahahindura amacamba,
 15 Ikahavura kuba isayo,
 Ikaharyama humutse,
 Wayibyutsa ntibyumve;
 Wayikoraho uyegereye,
 Ikagusigaho icyondo,
 20 Ikagukwiza icyagane;
 Yakureba igitsure,
 Ukirinda kuyicyura,
 Aho ishakiye gutaha,
 Ukayikurikira iyo nyumba,
 25 Ukayireba uko yateruye;
 Ukayikunda mu ngendo,
 Ntitorwe mu ibondo,
 Ukirinda aho yaciye,
 Ko hanuka bibi cyane!
 30 Wayireba itambuka,
 Ukayirata kuba itungo

Wayikebukamo imihore,
 Ukayihongera ibijumba.
 Uko yatendeje izuru,
 35 Ku iherezo ry'umutonzi,
 Ni ko itengura ibivuvu;
 Iyo rwarika-mavubi,
 Ikabihoroba ikabihwanya,
 Ikabivunja ikabivuruga.
 40 Aho isohokeye ngo urebe,
 Ukayikeka kuba imvuzo,
 Ari ukwuzuraho ivu.
 Ubwo iteye mu nyambo,
 Z'Umutware w'Uruyange, (1)
 45 Yinyuriye ku irembo,
 Bikanga rwabwiga! (2)
 Ingeyo zose zirakubana, (3)
 N'abashumba barabyuka,
 Barahamuka, barahuruza;
 50 Imyinjiro yo ikaba itanu: (4)
 Bayihimbyamo amakome!
 Ubwo ibiruru birahanika,
 Inzamururo zirahoga! (5)
 Uwarusazanye muri bo,
 55 Yirata kuyitsirika,
 Amagambo arayacurika,
 Ayibwira amateshwa!
 Ngo "Umurizo urawushyire irya,
 Na yo amaso uyampange!
 60 Wikwigira hirya:
 Gumya usange ibiraro!
 Mu buryamo nihakonje,
 Mu ijanja nihashyuhe!
 Ntutinde mu igenda
 65 Gira uguruke ay'intashya!"
 Avugishwa ijoro ryose!
 Ngo burakeye barareba
 Iyo ntamati ibugarije:
 Yegereye imyugariro
 70 Iraharyama harazibama.
 Bayitura izimano
 Umutware yohereje:
 icyo gitebo cy'ibijumba,
 Ngo ikirabukwe ku rukinga, (6)
 75 Iragisanga igihugiraho,
 Buguruye ziraturuka!
 Umutware w'Uruyange (7)
 Yemera ko mu nyambo,

Z'Umwami nyiri u Rwanda
 80 Bayirabukira ibitebo
 Bakayoboka ikabatwara
 "Indyohesha-birayi!"

UMUVUGO II

Ingurube ikangaranya abashumba bo mu Muhozi

Intamati izimba ibinyamahembe,
 Dore rukangaranya-bijumba.
 85 Ndagiye inyumba y'ijosi rinini,
 Iya rufuhira mu bishamba.
 Ikaruta intama zo mu bakungu
 Ikaruta n'inka zo mu Batutsi,
 Ibyo nta n'umwe ukibiyijana.
 90 Ikarusha inyambo kuba urujuju,
 No ku bicebute ikazibumba:
 Aho ziba zamuje mu mahembe,
 Izirusha umwijima wayisabye,
 Umunsi itera abo mu Muhozi, (7)
 95 Ikona imirima bukigoroba,
 Yaje igambiriye ibijumba
 Ijya mu mirengo irahayogoza,
 Ihorobya izuru iba igisongo
 Igira ibisinde irabyerereza
 100 Isiba imigende iraringaniza.
 Imaze guhimbarwa n'umurimo,
 Ihatsika izuru ihata ibitengu,
 Ikubira hirya ikubira hino,
 icyuho iciye kiruta umurima,
 105 Icura haruguru igeza hepfo,
 Amayogi yose iyagira intabire,
 Imara ikirumba nticyarara,
 Impumu zije ntiyabikangwa
 Irazipfukirana itera ahandi,
 110 Aho irahacumbika biracika:
 Ikubitaho umutonzi yatyaje,
 Ikoza ku bwoya irakubeta,
 Iwukaza ubugi ngo butagimba!
 Isonga ryayo irishyizemo ubumwa,
 115 Ituruka haruguru y'ubuhinge,
 Iterura irengereza imugongo;
 Mu ruharuriro irahacukika,
 Ruruta amayogi rurayasumba.
 Abahahinze ntiyabaryarya;
 120 Irimba, ibereka injumbure.
 Yanga iby'amazimwe ya rubanda

- Ihitamo kuhabumba rukumbi,
 Ihagira inkuke yo mu nyambo
 Abanyamuhozi ibahaka neza.
- 125 Imaze kurengeza imbavu zose,
 Ibura uko yamiragura ibindi,
 Igira ibijumba ibisasa neza:
 Ku bya kandore iraharambya,
 Ibya magabari irabyisegura
- 130 Ibya gisabo aho yabitinze,
 Ibondo ryayo rirahashikama.
 Ukwo yagakuye karunganwa,
 Ihagika mu ijigo nk'ibitabi,
 Nuko ubwangati buyiturutse,
- 135 Igumya gusemeka ubukungu
 Ibura ukwo irambya birayigora
 Ishaka ubwihina birayumya:
 Nuko igangara ukwo yahagaze.
 Mu nda hibyara amahane
- 140 Buba uruvuyange birahoga!
 Ibiyoka byibuka kwigorora
 Abantu bose bavuzza induru,
 Abararirizi ni bwo babyutse,
 Babazanya iyo ntare iroha urwunge
- 145 Ngo : "Irarohera epfo iyo mu gishanga!
 Kandi ubanza atari isanzwe:
 Iyo rwabwiga ifite ijwi rindi,
 Riruta ay'intare zo mu Rwanda!
 Murabe maso itamara ibintu!
- 150 Abafite inka ariko murite hanze:
 Yabatsembaho ayo matungo
 Ejo mwarundurwa n'ubutindi
 Ubwo mudatunze ya nka y'ubu
 Bita "Indyohesha-birayi!"

UMUVUGO III

Majoro ayaka Abasilimu; na bo bayirega Abanyamishanana; hanyuma Ildefonsi Mutembe ayiranga kwa Bitugangando, mu Nyakibanda.

- 155 Inyumba isanga inzira iyo igenda,
 Nti: Iya rubumbuza mu muhanda,
 Ndavuga ingurube batagereranya
 Iya rudacishwa amayira asanzwe
 Si inyamaswa ni ikirunga
- 160 Uyibona iseduka mu isayo
 Ugahuga ibyitwa gutangara,
 Ukabura ukwo isa ugatayo utwatsi!
 Jye nayobonye ukwo nayibwiwe

- Umunsi irangwa impera y'igihugu
 165 Igaca rubanda umukendero
 Iturutse ahantu nje kubabwira.
 Majoro agambiriye Abasilimu
 Ati: "Mwe mutunze ingurube zacu,
 Murazirunde muzinyereke
 170 Ntore iy'urucece yijihije
 Izazimanwa ibirori byaje!"
 Baranasigana abahungu,
 Bati: "Dore kwishwa imirimo ngibi!
 Kuba abasilimu bo mu magote
 175 Ibyo biragaragara ntibigihishwa!
 Turakubwira gahwa mu rwondo:
 Abadusirimukanye mu bwenge,
 Benda ingurube bareka igote!
 Bagumana isunzu benda isake!
 180 Ingofero zacu barazitinya
 Amagi aho atewe barakukumba.
 Ukwo baduhenda turihoera
 Baraturyamira tubireba!
 Baba injajanganya bakuryarya!
 185 Ukwo batunnyega ngo turafurebye,
 Amata zihumuje bagateka.
 Imineke bayimaze mu gihugu
 Bakayisomeza aho n'inzagwa,
 Ibyo Umunyarwanda yarabiziraga
 190 None wibareka, nibaze:
 Na bo barunde barazitunze!
 Ntugakangwe na karavati
 Abanyamishanana baraziturusha."
 Majoro ngo abyumve avunya Abatutsi,
 195 Arabibabwira bagwa mu kantu!
 Barigunga umwanya munini
 Aho bigeze bati: "Uwabimubwiye
 Yanze Umwami, aradupfuruye,
 Abuza ko isunzu riduhishira!"
 200 Mutara ni bwo ahamagaye imishanana
 Yo n'amagote biba uruvange,
 Ati: "Uyu Muzungu reka azitwake
 Nta mugayo zituruka iwabo!
 Dore inka zanyu nazibaka,
 205 Mwazirunda nta mahane,
 Kuko mwazigabiwe na twe!
 Ngaho mwishakemo inkuke!
 Uwayiturusha agure aba bantu!
 Uwo byaturukaho ayidukinze,
 210 Byamukoraho mubikinisha!"

- Bati: "Erega ingurube ni ibihumbi!
 Turazitunze tuba tukuroga!
 Nyamara iyaruta izo mu Rwanda
 Iyo uwo Muzungu twumva ashaka,
 215 Itungwe na nde wo kuyitanga?
 Kuko ingurube iryoha cyane,
 Ikaba tutareka ko iba umucanda!"
 Umwami ati: "Reka mwidutinza!
 Aba b'ibigoma barazitunze!"
 220 Akebuka Semutwa na Mutembe: (8)
 Bajya mu ruhando aho mu bahungu
 Abahata ijisho bashya igitutu!
 Arabyitaza Semutwa ariko,
 Ati: "Nta ngurube ngira mba nkuroga!"
 225 Narazihumbye nkiri umuntu!
 Narazitsembye nkijya kubyibuha
 Insigazwa yazo nimundebe."
 Ni bwo Mutembe amwanzuranije,
 Ati: "Reka abeshye Umwami mwumve!"
 230 Ubwo duheruka kuza i Save,
 Nta bwo wishe ingurube ikuruta?
 Nta n'urwandiko waturatiye
 Rw'Umuzungu utuye i Rubona
 Rw'ukwo utunze ingurube z'iwe,
 235 None ucurikiranye izo ndahiro?"
 Sendashonga agira Mutembe (9)
 Ati: "Urasesereza ibirego cyane!
 Aho yazirazaga se uhavuze utyo,
 Abanyazi bahatumwe zigashirayo,
 240 Twabigira dute ku itariki? (10)
 Jya uhakoza agatima wibwire,
 Wibuke guhina amagambo!
 Ahubwo va ku giti dore umuntu:
 Bwira Umwami interuro yawe
 245 Yo kuba uri inganza-marumbo!
 Ingurube z'ibicece z'ubwoko,
 Uzifite yivamo nk'inopfu!"
 Umwami abyendera mu kirere,
 Ati: "Erega ni ukuri ko Mutembe!"
 250 Gira uturangire izidutunga,
 Ubwoko bwazo aho wabusanze?"
 Undi ati: "Iyo ubimbaza utyo tukiza,
 Mba nabirangije kare kose!
 Ndabikubwira usange ari ukwo!
 255 Ubwo ugarukiye mu Nyakibanda,
 Nta Mupadiri wahasanze?
 Ubumiramize aburusha Rubanda,

- Akaba ari jyewe umunyura heza!
 Nta bwo agereranywa mu mubyimba:
- 260 Izina yahawe ry'ubwo bwema,
 Bitugangando riramukwiye! (11)
 Nguwo utunga izirema ibondo!
 Nguwo utanga izihaga umuntu!
 Nguwo uwagukiriza abantu,
- 265 Akabaha inkuke y'uyu muni!"
 Mutara ati: "Ngiyo yewe inama!"
 Ahuta asanga Majoro mu nzu,
 Ati: "Iyo washakaga ubu nzi aho iri,
 Ni ukwo itunzwe n'abadatorwa, (12)
- 270 Kuyikomeraho nkabibakeka.
 Nyamara wanditse nk'ibaruwa,
 Nkayiha umuntu akayigabana,
 Ari wowe ndabona ko byashoboka!"
 Majoro abyumvise arahuta.
- 275 Yaka wino ashyira ku meza,
 Araruziringa afunga bahasha,
 Baruha umuntu ngo ahutere,
 Ajye Nyakibanda shishi itabona
 Kwenda "Indyohesha-birayi!"

UMUVUGO IV

Urugendo rw'iyi Ngurube, kuva i Butare kugera i Nyanza: ibambira umuhanda, modoka zibura inzira.

- 280 Ingurube iryohera mu misango,
 Iya rwisumbura ku ntama,
 Nkunda impogazi y'imihore,
 Iya rusukirwa n'abo mu nzu.
 Isonera amenyo y'abayishiha
- 285 Ikarusha isake gushya mahwane
 Igira imihore rutagugumba,
 Igera no mu nda igahwekera:
 N'uwayiriye agaheza utubavu,
 Ntagugarirwe yabera.
- 290 Umunsi Padiri uwo ayitanga,
 Yaje u Bwanamukari ihaze,
 Ihaga amabondo iziba imihanda
 Mashuba zose zirahagarara,
 N'abadereva baracemererwa;
- 295 Baravunura bajya i Buzungu
 Kubasiganuza inzira yindi,
 Kuko iyabo ifunze neza;
 Ingurube yuje no mu miserege,
 Bakaba batageza kuyikikira

- 300 Ngo iruhande babone umwanya.
Arabibasubiza uwo mu rukiko
Ati: "Reka mwihimana se na mwe!
Nta mihanda ibiri naharuje!
Mpimbe uwundi se mu kirere
- 305 Ari ukugirango mbone aho ndara?
Nk'icyo kintu se nkigire nte?
Nta bwo muzi ibirori byacu?
Cyatumirijwe kubyizihiza
Na njye nzagenda ejobundi
- 310 Negutangwa aho bagiketa.
Nimugikurikire mwitonze
Mwige intambwe nk'iz'abantu
Aho kizishinguye muhaze,
Kugeza aho kiribuze kurara
- 315 Ubwo kiraseduka mu muhanda
Muhutere mujye iyo mwenda!
Na mwe mwigira ako gahinda
Kirabagora iby'uyu muni
Nta we uzongera kugitunga:
- 320 Icyo ni icyaduka kidahoraho!"
Ingurube igomagira umuhanda,
Iwuca ibitengu henshi cyane,
Ari n'ikizuru ari n'ibibari:
Intambwe zayo ziraniburana,
- 325 Isi kiziteye iratengerana,
I Nyanza bumvise imirindi,
Induru nyinshi zirasahaha!
Icyo bikanze kikaba imvaho,
Icyo baketse ari ibihuha:
- 330 Bo bikanze igishitsi cy'isi,
Naho iyo ngurube ari yo ibiteye.
Byanze guhita bararikenga:
Babanga amatwi barahuririza,
Babazanya indi mpamvu ibiteye.
- 335 Intumwa zikwira aharengereye
Barayirabukwa iri mu muhanda.
Bajya guhumuriza amashuri,
Ngo: "Nimukomeze kwiga inyuguti,
Mwegukuka umutima bundi,
- 340 Kuko impamvu itumye bicika,
Ari imashini yo mu Burayi
Igeze i Buhimba iva ku Ngunda."
Ukwo cyegera barashishora,
Ya mashini ibamo igisimba.
- 345 Bamwe ngo: "Ni inzovu twabwiwe!"
Abandi ngo: "Reka mwitubeshya!"

- Inzovu zisanzwe ukwo tuzibwirwa
 N'ubwo nyine tutazibonye
 Nk'enyere zaguranywa iriya!"
- 350 Babona umuntu uturutse urw'iyoy
 Bamushiganuje arababwira,
 Ati: "Ni ingurube nk'izi muzi!
 Ihanitse urwego ijya mu ibondo
 Izibye umuhanda murabiruzi.
- 355 Ababona nabi iri bubagereho!
 Ibyo biyikurikiye by'ibiyumbu,
 Si ibibwana mutabikeka!
 Ni amamodoka yabuze akayira:
 Zayigaragariye bugisesa;
- 360 Ubu zirahindisha amahoni
 Nyamara y'ubusa, nta cyo yumva!
 Na njye kuyicaho ubu mureba
 Ni uko ninyuriye iruhande,
 Nca mu bisambu no mu ntusi,
- 365 Ndagota neza ngaruka hino,
 Nza mu muhanda ndikomereza.
 Abayirebye bacyitonze
 Bahoze bagarura ab'impunzi
 Ngo: "Nimugarukire aho muhinge
- 370 Si igisimba ga ba nyabusa!
 Ni ya yindi yo ku rurembo
 Abanyagikari bahezereza
 Bayitekanye n'utunono,
 Ngo ari yo "Indyohesha-birayi."

UMUVUGO V

Urugendo rw'iyoy Ngurube kuva i Nyanza kugera i Kabgayi: bakeka ko ari imvura; uwahoze mu Buganda yemeza ko ari itanki irwanishwa mu ntambara.

- 375 Intamati ihinda nk'inkuba zesa
 Iya rwitonganya mu gituza
 Ndate ingurube y'umunihiroy
 Mvuge ruhinda mihumeko,
 Umunsi iyobera abari i Nyanza,
- 380 Ikamenya bose byabagoye,
 Iza i Nduga yose bayiha induru,
 Ahanini igihugu gitangara.
 Ije mu Marangara biba ukundi:
 Yungikiranije umunihiroy,
- 385 Bayikanga kuba umuvumbi.
 I Gihuma hose bava mu mirima,
 Bagana mu ngo birukanka
 Ngo batanyagirwa bagakonja.

Abaseminari ubwo mu mashuri
 390 Bakaba bameshe mu gitondo,
 Baka uruhusa bararuhabwa,
 Rwo kwanurira imyenda mu nzu.
 Babigira ariko batangara,
 Kuko ihinda ubutaruhuka
 395 Kandi ibyoko biseka hose.
 Abaje kwiga mu misiyoni
 Imitaka yabo barayibamba
 Abandi birukira amabaraza,
 Abenshi bugama ku mashuri.
 400 Ababuze ibyicarwo batinze,
 Bakikinga nko ku ntusi
 Cyangwa ibindi biti bigaye.
 Abagira isinde barayitaha
 Abanyamagote bayajya mu nda.
 405 Abatabigendana barasuma,
 No mu rutoke rubegereye,
 Amakoma yarwo barayakonda
 Ngo nishoka bayikingire
 Ah'igihimba n'umutwe byombi.
 410 Igihe bakiri muri izo mpuha,
 I Shyogwe hamanuka abantu itimba
 Amaso yerekeye umuhanda.
 Abari i Kavumu na Kabgayi,
 Ubwo barashiguka ari yo bareba.
 415 Ariyamirira imva-buganda
 Asoza impuha yahoze ahimba;
 Ati: "Nimurebe ngiyo tanki,
 Imwe nababwiraga ntimubyumve,
 Iyo Abongereza barwanisha!
 420 Sinshidikanya ni yo rwose,
 Ingamba zayo narazirwanye!
 Nuko ndebera kure yaho,
 Wenda nasanga ari rwanjye!
 Ntimwegere irimo amasasu!
 425 Yaba yenda ije kunyenda.
 Kuko ikunda abo yamenyereye:
 Murankingire itandeba,
 Ngumye nsemurire abatayizi.
 Iyo ntirwana irakaba ukwo iri!
 430 Irasa amabomboma ukayikunda,
 Irasa imizinga ikica ibintu,
 Irasa amasasu yo mu mbunda;
 Irasa n'imyambi mwumve na mwe!"
 Irekura nk'ine aho iri hariya,
 435 Ikagwa i Buganda ahitwa SSingo,

Cyangwa ahandi hitwa Cyagwe,
 Ikica nk'abo bo mu Buremezi.
 Nuko mwigumiye mu by'ino
 Naho ibyo bihugu ni iyo gihera,
 440 Dore ko ari iyo riterwa inkingi!
 Indaro zaho ntabakabirije,
 Ku byumweru ugira umunani.
 Urebe tanki ko ari icyago,
 Iyo Abongereza bagira ni imwe:
 445 Izira iya kabiri aho yabera!
 Nyamara kandi ukwo imara abanzi!
 Ntugatererwe iyo ntindi!
 Igira Abadage ikica icyenda,
 Uwa cumi wundi ikamukomeretsa,
 450 Imyambi yabo bayiyirasa
 Ikarora hirya igatomera,
 Ari amageza yifite mu nda!
 Si imbarirano murabiruzi.
 Za mashuba izo ziyihomereye,
 455 Ni izi ndege mujya mubwirwa,
 Zimwe ziguruka iyo zibishatse!"
 Abagore bose bagira imbabazi,
 Bashika bikubitira ihururu,
 Bashungera baremye inteko,
 460 Ngo: "Ego mama iyo ni yo tanki!
 Aho se batindi murayibonye!
 Yego mama twayibonye
 Yaratubwiye uwo Munyarwanda
 Twe tumukekamo ibyo kubeshya,
 465 None ngaha turabibonye!
 Yayisobanuye ukwo yayize!
 Ego mwana w'Abazigaba!
 Yego mama iyo ni yo tanki!
 Yego mama iyo ni yo tanki
 470 Yego ngiyo, shenge ngiyo!"
 Abagore bose barasizora,
 Impuha zibagishiramo idogo.
 Haguma yumvise aza kurora; (13)
 Ukwo yagasanganiye icyo kintu
 475 Ati: "Iyo si tanki barababeshya!
 Ni iri tungo tuzi neza!
 Tukarikunda aho se bagenzi!
 Uwo mufa wayo iyo uwushyikiriye
 Ukawivangira n'ibijumba
 480 Cyangwa uminjiriye mu bindi!
 Birakuryohera ukabitsemba,
 Wagira inyota ukanywa ubutitsa

Ufite kinini agashyira ku munwa
 Ngo yibihire atawumyora!
 485 Mutangare mutegereye
 Mutayikanga bikankoraho:
 Iratembera igihugu cyayo!
 Ntitukiyita ga ingurube burya:
 Twayihaye izina ry'intore
 490 Ryo kuba "Indyohesha-birayi."

UMUVUGO VI

Urugendo rw'iyi Ngurube, kuva i Kabgayi kugera i Kigali; itesha Abatware imirimo bagenda bayihatsweho.

Inyumba iryohera n'amaso
 Amerwe akica aho itabazwe
 Ndavuga izongesha abarebyi!
 Ngiyo intamati ihaka Abatware,
 495 Iya rwikundwaho n'abasilimu.
 Iyo basamarira bayirabutswe,
 Iya rwikanyiza abo Batutsi,
 Umunsi ihinguka i Kabgayi
 Abo mu Marangara ikabakaza ipfa,
 500 Yarahatinze cyane Haguma,
 Akabya guhanga iyo nzovu amaso,
 Aritegereza aratangara,
 Intege zitaha arazihebura;
 Atumiza igare ryo kujya i Nyanza,
 505 Kwaka uruhushya rw'i Nyarugenge.
 Bati: "Urarwakira ubusa cyane,
 Kuko Isabukuru yegereje, (14)
 Mukaba mwarabihagariwe;
 Ube uhengeranije icyumweru!"
 510 Ati: "Narushakiraga indi mpamvu,
 Ngo mputere amasiga muyaga
 Nyifatire ahagana ku Ruyenzi (15)
 Tujeanyirane nyizihirije!"
 Bati: "Ese ni iki uvuga Mutware?"
 515 Ati: "Munyinjira iki muyizi,
 Ko ari yo ndondogoza-barebyi!"
 Na we Atanazi ari we Kanimba, (16)
 Apfa ayo kuyibona ibungabunga;
 Iby'urwo ruhusa biramurenga!
 520 Icyo yiringiye kirasohora:
 Ingurube ihingutse i Nyarugenge,
 Izembagira Abakuru mu maso,
 Habura uwibuka kumutota!
 Uwitwa Mfizi ari we Alfonsi, (17)

- 525 Yari yagiye migezo nk'ukwo,
 Ubutoni bw'iryo tungo rinini,
 Burangaza bene ubwite
 Isaruti abahaye iba iy'ubusa:
 Kuza imbura-gihe kwe n'imirimo,
- 530 Abyizigura nta hazabu!
 Umwete w'abakuru waragiye
 Uhugira ku ngurube rubunga:
 Ifata mu maso barahumiriza!
 Naho ubwo Semugeshi i Bufundu (18)
- 535 Asanga Rwitsibagura mwumva, (19)
 Afatiye Birasa ahagana i Nyanza (20)
 Bari ku kirari cy'iyongurube,
 Bamwingingira kubajyana.
- 540 Uwo mu Bufundu akaba anywa itabi
 Ariyumvira bimara umwanya;
 Ubwo aribwira ati: "Ntibagerayo
 Turayisangira barye byinshi,
 Mbe nitubirije umugabane!"
- 545 Ashyiraho akenge arabahakanira,
 Ati: "Ibyo biranyereka ko mwembi,
 Iby'iyi modoka mukibibarirwa!
 Uko muyiruzi iyi iragatsindwa:
 Igira amanyembwa aruhije ubwenge!"
- 550 Yumva abantu bayinjyemo,
 Abatari jyewe ikabahishura!
 Ikanywa lisansi vuba na bwangu
 Igasara nk'iyasinze, igahwera!
 Nkazagomba kugura inshinge,
- 555 Nkaziyitera igahembuka!
 Kuyibashyiramo byaba rwana,
 Si ibigeragezwa ku rugendo!
 Yadupfana aho tuvugiyeye aha,
 Ikadutamaza bikadushobera!
- 560 icyakora mwantuma guteguza,
 Ndetse mukandika nk'ibaruwa
 Ivuga ko mwaba mutahasohoye,
 Ingurube ikicwa mukiri mu nzira
 Nahabwa igaburo ryanyu
- 565 Ngapfa kugerekeranya ku ryanjye
 Ngo ndore iherezo ukwo byagenda,
 Umuntu w'imfura abiyihase
 Agashira inyota y'iryo tungo
 Bita "Indyohesha-birayi!"

UMUVUGO VII

Igeze i Kigali mu birori irabitegurirwa: Umwami n'Abatware bayikikiriza ku meza hamwe na Bwana Rezida.

- 570 Mugabo wo mu mbira z'i Buzungu
 Wa rwitahira mu Bahinde,
 Ingurube iryoha kurusha byose,
 Iya rwinopforwa karindwi,
 Nkunze intamati y'inyama itoshye,
- 575 Iya rwikundwaho n'Abazungu
 Ahari mu nda igira sukari!
 Abanyankweto yarabararuye;
 Barayikunda byabashabije!
 Abatanirije bayirya ubwoya:
- 580 Amagufwa yayo ntibayatanga,
 Barayajundika iyo bagenda;
 Amatama yabo ni aho aturuka.
 Ije kuba icyaduka i Nyarugenge,
 Abakuru bose barayishima.
- 585 Ijyanwa mu nzu bimara umwanya,
 Ntiyanasohoka bimara umunsi;
 Ibyuma by'inkota z'indayi,
 Bihava byambaye umwisheke!
 Abakozi baho ukwo nabarabutswe,
- 590 Umwura batobye wari mwinshi!
 Ngo bucyeye ibirori birasakabaka,
 Birasamaza biba urugera!
 Abakuru bose ukwo nababonye,
 Babyizihiza bari nk'abandi:
- 595 Umutima wabo ukaba ku kantu!
 Isaha yegereje amashoka,
 Ba Madamu batuma umuntu:
 Aje arabarembuza baragenda,
 Ayo mazu meza barayataha!
- 600 Barahonongera mu bibanda,
 Ibyo bifafari barabifunga!
 Nuko Rwitsibagura araza, (19)
 Acira ifudika ari ku muryango,
 Uko yagatashye iryo juru ryabo
- 605 Arabukwa ameza aho adendeje:
 Yumva yirukwa mu birenge,
 Umutima usaba ubugwa-neza
 Umuhogo wuzuramo urugwiro
 Inzoka yo mu nda isamuza umwuka,
- 610 Igira ngo jorororo mu ibondo
 Yumva ahongobotsemo ibintu,
 Agira ubukirigitwa umunwa wose,
 Azana udutwenge aramwenyura,

- Abwira abandi ati: "Karabaye!"
 615 Naho ubwo Rwampungu aratamba!
 Abona isahanu ahingukiyeho,
 Arayivumerera uko bisanzwe
 Ajya kuyihobera baramubuza:
 Barazigaziga ararorera!
- 620 Ahaguma akanya ariruhutsa!
 Amatsiko amweguye arora ahandi:
 Abona isahani ipfukuye neza,
 Ifite urugara nk'urw'intango!
 Umufa uyicagase arawureba,
- 625 Abona wahindutse urunyenyeri!
 Asiga iye ya mbere aza awusanga!
 Birasa ati: "Uba uroga Umwami! (20)
 Nta bwo ureba ko iyo sahani,
 Ari iy'umuntu wo mu kizungu,
- 630 Wize kera kuba umusirimu?
 Nta bwo wamenya kuyikaya
 Ngo uyumvishe ko wayishegeshe
 Yireke nyende jyewe ubizi
 Wekudondoza iyo mihore!"
- 635 Uwo mu Bumbogo abita hirya,
 Ati: "Reka nsizane ku rubanza,
 None ntasirimutse nka we,
 Iri tama njunditse rinigiriye,
 Ndora rihwanye na karavati
- 640 Ryampa icyicaro ku ngurube,
 Simpatsimburwe n'abakweta!"
 Ni bwo Umutware wa Nyantango (22)
 Yinjiye abakurikiye hafi:
 Ayihamya ijisho rurumirana.
- 645 Ijwi rye arirangurura adatinya
 Atera hejuru by'imvaho,
 Ureke iryo bamwise ry'impuha;
 Ati: "Ni yo nta shiti ni ingurube!
 Ntisamaza mu gihagararo;
- 650 Nyamara uyorosoye ubwoya,
 Itera ubwuzu bw'urukirigite,
 Ukabona usagutswe n'ibineza;
 Aho bayibyagiriye ku meza,
 Ukajya ushyugumbwa kuyagaza!"
- 655 Abo b'inkwakuzi ngo bahoshe,
 Abandi bose bizihira inzu:
 Babagabira intebe zo ku meza!
 Nta rugamba rubura intwari
 Majoro arwicara ku mukondo,
- 660 Umwami ateka ijabiro ryarwo.

- Ababegereye mu cyubahiro,
 Babajya hirya, abandi hino
 Barema uruhushya rw'isangane,
 Mbona abasaza barimo Nturo, (23)
- 665 Ujya abasemurira ku Muzungu,
 Ari Rwubusisi nyiri Ubuliza, (24)
 Dore ko acanganye muri byombi:
 Ni umusaza wazungahaye!
 Majoro ati: "Abasaza uko mbirora,
 670 Ntitubahatire guhumana!
 Babahe akayoga mu biro byanjye
 Tuhabasange isamunani!"
 Mutara ati: "Untanze inama yabyo,
 Nari ntegereje kubivuga!
 675 Kugundira abanyamurava,
 Ukabakoreshaho iby'umuvundo,
 Biba umugayo ukomeye mu Rwanda!
 Ubukuru bubatera guceceka,
 Ngo wibwize ubupfura na we!
 680 Ingurube bayinena bikabije,
 Bakirinda kuyihunza,
 Ari ugutinya amakuba kuri mwe!"
 Uwo mu Bwishaza arora hirya (25)
 Yanga kwumva ukwo bamuhenda;
 685 Agira Simoni na Rwubusisi, (26)
 Ati: "Sinkunda ko bampeza!
 Mparaye irindi zina kuri ubu,
 Iryo bampimbye Rukenyangurube;
 Gukenya inkware narabizinutswe!"
 690 Kamuzinzi akebuka Umwami, (27)
 Ati: "Abasaza mubahe amayoga,
 Ni yo bakunda bari mu birori!
 Nyamara ngusenge uri nyiri u Rwanda
 Ungabire imyanya ya bane muri bo!"
 695 Mutara ati: "Imyanya sinyitanga,
 Kuko nshaka kuyikubira!
 Bambe Umwami nta bwo agabura!"
 Kamuzinzi agira ikimwaro;
 Ngo akikure azinga icyanwa;
 700 Akaraga azungije mu gahanga;
 Ati: "Ni jye utegeka Ubugoyi bwose
 Ushaka itabi ampe iye sahani!"
 Majoro ati: "Nturo ga muhaguruke!
 Babahe ibyicarwo bibakwiye,
 705 Na twe twigire mu byacu!"
 Nturo ashaka ukwo yasubiza
 Biramugora akebaguzwa arira!

- Yari yabonye ibintu byiza
 Ukwo byakuzuye amasahani!
- 710 Ubwuzu bwabyo bumurya mu nda,
 Akanwa ke kuzuramo amazi,
 Avuga mu muhogo hari ikiniga
 Amaso azengamo amansonza.
 Arangurura ijwi arahira Kigeli,
- 715 Ati: "Reka Bwana winkubirana!
 Ndi umusaza nkaba mu byacu,
 Nyamara nkigimba n'ibyanyu!
 Sinabeshya imbere y'Umwami,
 Sinaryarya abagabo ndi undi:
- 720 N'iby'ingurube ndabivuyanga!
 Sinagenda wenda umfunge,
 Cyangwa wigurire ukwo ushaka!"
 Igihe ataragusha bamwumva,
 Babona Rwabutogo araranganya, (28)
- 725 Afurekana umunya mwinshi!
 Bamushiganuje ukwo bigenze,
 Ati: "Nahugiye ibyo kwumva Nturo,
 Nsanga bantwaye isahani
 Iriho imihore iteye ubwuzu:
- 730 Bayikururira kwa Rutsinga, (26)
 Bampa iye iriho intongo nkeya!"
 Undi ati: "Urapfusha ubusa amagambo!
 Nkozemo kabiri indiba iragaragara!
 Isa n'iyiriwe imbere yanjye!"
- 735 Kalima ati: "Erega Karyabwite, (30)
 Amada yafodotse ni inkeke
 Nta bwo ashobokera mu rugendo!
 Ibyo bandembye nta kavuro,
 Umenya ngo ntereye inyuma yanjye!
- 740 Wangerurira iyo sahani,
 Wowe kuko imbavu zarenzwe!"
 Undi aramusubiza ati: "Watuza!
 None ntengase mu idoma,
 Amatama yawe yo ko adahokwa?
- 745 Ahora agutengarana iyo ugenda,
 N'urwo rwakanakana ruje!
 Uranatubeshya si ukubyibuha:
 Uhora ubijunditsemu amarenga!"
 Rwaburindi, Rwabukamba, (31)
- 750 Na Bisamaza nyiri Ubukamba,
 Baza buhanya batinze
 Ngo: "Mwatindiye iki bahungu?"
 Bisarinkumi ahuta gusubiza (32)
 Abigira mu izina rya bose

- 755 Ngo: "Twahangariye izuba,
 Ngo ridukamure ubuhage
 Bw'ibyo twizaniyeho impamba!"
 Rwabukamba ati: "Emwe si wowe!
 Ko ubibabwiye se utabakinze,
- 760 None bagerura ibyacu,
 Ngo aha twijuse iyo mu menyo?
 Niba ari byo ntitwahoanye?
 Rwaburindi azana igihama,
 Amira umuhore atawukanje:
- 765 Ugeze mu muhogo haba impatanwa;
 Asepfura cyane ajya iwa kajwija
 Asamba asumira Rwubusisi,
 Ibyo yamenyereye gufata inkingi
 Iyo anizwe yicaye mu kirambi!
- 770 Akoma igipfunsi aho byatumbye
 Ingoto irahokwa birururuka:
 Ingurube ihoroba ityo ibutagarukwa
 Igira ngo dumburi mu idoma!
 Ariruhutsa asesha amarira,
- 775 Ati: "Yambabaza, yabigira ite,
 Ndayiheraheje ni byo bizi!
 Ubwo yegereye umutima wanjye
 Ugiye kwicara hamwe mu nda!"
 Na we Ntaganda arisihinga (33)
- 780 Ati: "Ndabitirirwa kurya ingurube
 Ushaka kurora ukwo babigenza,
 Azane isahani ye mwigishe:
 Turayicuranwa bya gitutsi,
 Sinza kworeza ukwo bisanzwe!"
- 785 Rwamuningi ati: "Wirata! (34)
 Amaboko ajigita ingurube igahora
 Ugira ngo uvovore imihore
 Ndayagushumbije urabiruzi!
 Sinahoze nigisha amashuri
- 790 Nkanswe ibyangize Kalisimbi?"
 Ubwo Fransisko Nzaramba, (35)
 Abona isahani y'icyiyuhize
 Iriho ibitongo by'uruvuteri
 Afata mu maso abiroha mu nda
- 795 Amagufwa n'umufa byorerera ko
 Nta ndamyi yasigaye bishiraho!
 Nuko Nyangezi arababwira, (36)
 Ati: "Simbasha kuroha nka mwe!
 Mbona mucuriranya ubudatuza
- 800 Nkumva nshengurwa n'intimba
 Nzira gusazira mu bututsi:

- Umuhogo wanjye ugira inda ntoya!
 icyanjye mwampa uruhushya mwese,
 Nk'utwo nsaguye nkatujyana,
 805 Nkazitondera ku kiraro,
 Nkifatishiriza ibigori!
 Erega na mwe muri abana!
 Nta we uryoherwa aroha bwangu!
 Iyo ndi jyenyine nditonda:
 810 Bampa ingurube nkagira ubwuzu
 Imbabazi inteze zikaba inyanja,
 Ziruta iza nyina wayibyaye:
 Na mwe mwumvire aho bahungu!"
 Biniga abangikana na Mbaraga, (37)
 815 Barushanwa bunguri biratinda:
 Umwe amira intongo akeba umuhore,
 Undi aroha mu nda ukwo byakaje
 Umwe abira ibyuya by'uwo murimo
 Undi amaze kwagirizwa n'impumu!
 820 Rwiyamirira ngo abigane, (38)
 Aranigwa cyane amarira araza!
 Ubwo arayura yaba imbere ye,
 Ubusa ahasumiye buramubisa,
 Afata ikirere akanura amaso:
 825 Agumya gusamba iramwesura,
 Agugura ku ngiga y'umuhore!
 Na we Gitefano ngo amurebe (39)
 Aratangira arirahira,
 Ati: "Ko wabaye mu Bafureri,
 830 icyo gihe cyose wize ibihe?
 Nahoze ngirango uzanyigisha,
 Naho uracyanigwa n'Abatutsi?"
 Bideri ati: "Wirenganya umwana, (40)
 Ibyokurya ingurube aracyabyiga!
 835 Umaze kurunduka ntakanja:
 Ahirika bunguri nka Kalisa (41)
 Cyangwa akarora Kanyangira, (42)
 Ukwo amira avuruganya iyo mihore."
 Na we Kalisa ati: "Urabashunga!
 840 Ujya kuba intyoza bigira interuro;
 Aba yarabanje kuba mu Rweya,
 Cyangwa data se ahegereye,
 Nk'ukwo na we wahoze iwacu!
 Akaba nyamunsi iyo mu mparage,
 845 Akamira isatura n'amasirabo,
 Amafumberi ntayanene!
 Yaba atumiriwe nk'ibi birori
 Akaroha ingurube nk'ukwo undeba

- Akarusha isirimu kuhaba ingenzi!"
- 850 Kyangira yanga guhigwa,
Ati: "Aho Kalisa ntiwirata?
Izo washyikiriye ukazigiraho,
Si imiranga ngusagurira,
Jyewe utuye hirya yawe?
- 855 Ntiwumvise n'ukwo andatwa,
Agira ngo mvuruganya iyo mihore?
Dore ngutsinze impaka bareba,
N'ejo utanyuburaho imanza!"
Nuko akwegurira isahani,
- 860 Inyama z'ingurube arazagiriza:
Zipfa urufaya rw'itatabya,
Umuhogo ucuragira ubudatuza,
Usohoza iza mbere muri barohwa
Ugaruka kwenda izo ahirikayo,
- 865 Awugira rwajya, awugira rwaza:
Abakiza bose ngo: "Uramutsinze,
Uri umuhanga wo kumiraza!"
Na we Simoni wo mu Mirenge (26)
Ategateganya ibyo yahawe;
- 870 Agira n'ubwuzu we aravumera!
Ukwo agira imbabazi akora isahanii:
Arigata ku ntoki hato na haho!
Abwira Umwami ati: "Icyo ntegereje
Urampe umbwiriza ukwo bigenda!"
- 875 Dore Mikayire wo mu Busanza, (43)
Yize cyane mu Bafureri!
Arabirika imihore adahwema
Yanigwa akungirikanyaho ibindi,
Akaroha mu nda iyo bikagenda
- 880 Nguwo umwalimu nkwisabiye:
Ndumva nshaka kumwigana!"
Ndora na Fundi wo mu Rusenyi, (44)
Iyo nyoni ishaje ikiri ishashi
Izina yaryiswe ko riba umuntu
- 885 Ahaga utubondo asa n'agapira!
Na we Karoli ari we Rubayiza, (45)
Ahabura icyicaro yatinze;
Asaba guhabwa intongo hose:
Umwe akamuvungurira nk'akantu,
- 890 Ingurube isabika udutoki twose!
Ahawe isabune yo kuyikaraba
Ahinda uyizanye n'amazi;
Ati: "Inzira yose ndi buzirigate
Kuko naje nta gahamba!"
- 895 Rutamu abwira uwo mu Buhanga, (46)

- Ati: "Usabe imbari z'iyu ngurube
 Ufate neza ndi bukubwire!
 Amazi ashyushye uri ku kiraro,
 Bambe ndahoze uri bubirebe."
 900 Gashugi asubiza abiseka cyane,
 Ati: "Ibyo anyigisha yibagirwa ukwe:
 Ni jye wabanje kubimutoza!
 None wibutse ubwo buhanga,
 Umutsima w'ayo mazi se uri he?"
 905 Nuko Rwubusisi abirebye, (23)
 Yata inzasaya zirakunda
 Inyama ayidonda mu maraka hirya,
 Umuhogo uhorahoje biracweza!
 Bati: "Erega urabikorana ubuhanga!"
 910 Ati: "Ni cyo cyatumye ndondereza!
 Mbanza intongo ipfa nkaritsirika,
 Igihe ngiteganya iz'imihore!
 Bose bamara kurya ibyabo,
 Nkabanokeshwa nkayikuza!"
 915 Amiragura nka gatanu Kamali (47)
 Aheta umushyishyito nyamunini
 Yari yabikiye kwikuza!
 Ukwo yakawiroshye mu nkanka,
 Isibo y'ingurube ikina mu muhogo!
 920 Urwano narugiriye amakenga,
 Ngo biratengukana bijyane,
 Inzira yabaye agahombane!
 Na we Mukarage arigata ibyuma (48)
 Ahinira ku nkokora amashati;
 925 Inzara z'ingurube akazumutsa,
 Yanga kuzipfusha akamama;
 Aye masahani aranayakomba!
 Sinzi uwamubajije aho atwara,
 Gasinya asubiza by'ubuvugishwe, (49)
 930 Abihusha cyane abica iruhande!
 Ati: "Urashe icyitso ubivuze imvaho!
 Iryoshye ukwayo ntumubeshye!"
 Ryumugabe abwira Kaberuka, (50)
 Ati: "Ukwo iyi ngurube ifite ikinove
 935 Nayitangira mu gitondo
 Bukagoroba maze uruhande!"
 Undi ati: "Ndaguhebye uri akanyanda!
 Jye nayanzi mu museso,
 Nko mu mashoka inkono nkayeza!"
 940 Muregancuro abwira Katabarwa, (51)
 Ati: "Ifite aho yandutiye ibitari yo!
 Uyimaze, itera umunwa uburyohe,

- Ibyo ukabigendera bigatinda!"
 Undi ati: "Nagirango ntiwabibonye,
 945 Cyane cyane iyo ugize Imana
 Mu rugo bose bakayinena,
 Ukayibumbaho uri rukumbi!"
 Na we Kanobana ubwo arashega, (52)
 Agira Munyaneza w'i Buyaga:
 950 Ati: "Enda dukomeze turohe mu nda:
 Dore Muganga ari butuvure!"
 Undi ati: "Muganga uyu w'Umuzungu
 Yandusha ubuhanga bw'ibindi,
 Naho ureke ubw'ivutu rinyarwanda!
 955 Aho nacumbitse namenyereje
 Naratashije sinahubutse:
 Ibigega byaho ni bitatu bishya,
 Imisoto nayimenyereye kera!" (53)
 Na we Ruhorahoza ngo ayihage, (54)
 960 Inda ye imusagukira mu menyo
 Agira Butare uyu Godifiridi, (55)
 Ati: "Iyi ko ari uburiza turoyeho,
 Izo mu ishyamba birutanwa bite?"
 Undi ati: "Iy'ishyamba ibuzemo itoto
 965 Igira n'umwuka nk'uw'impongo!
 Imibi yakwaganya wahaze,
 Ukabona utuze urushyambashyamba!"
 Undi ati: "Enda kora aha ubivuze neza
 Iyi yanjyanye agatima kose!"
 970 Na we Fideli wo mu Bunyambo, (56)
 Ahaza abangamiwe mu maso,
 Ari iby'Umuhima ukunda injome,
 Akanga kwica inka ze amabere!
 Umwami ati: "Dore uwo Munyambo
 975 Unenye ingurube, tugize imana!
 Amata ari hehe akayagotomera?"
 Ibyo abibabwira yica ijisho!
 Injome bayitumiza uwo mwanya,
 Umufa w'ingurube bawucuriramo!
 980 Ngo bamuhereze ntiyareba:
 Akubita ku munwa rurumirana,
 Twumva abirohana inkubiri,
 Bivuga gorogoro mu nkanka!
 Biba urusumo umuhogo wose,
 985 Acurira hasi iyo mu kizenga!
 Ati: "Amata y'ino aruta ay'iwacu!
 Muranywe nk'aya aho kurya ingurube
 Mwabikomeza mwahumana!"
 Giti mu jisho agenda arata,

- 990 Inka zahumujwe amata nk'ayo!"
 Rwigemera ashize inkubiri, (57)
 Akora umukandara aradohora,
 Agatebe aragashikamira ukwo ari,
 Ati: "Uwabwira Majoro ijambo!
 995 Wenda atware inka atsotsobe,
 Agabure "Indyohesha-birayi!"

UMUVUGO VIII

Ibisingizo by'iyo Ngurube isuzuguza ibiribwa bindi.

- Ingurube ivura inkono kubiha,
 Ikagira ubwenge bwo mu bitekwa,
 Iya rwiganza mu Misiyoni,
 1000 Ncyuye indatwa yo mu bibagwa,
 Ize mu rusange rw'abadutwara,
 Ikunde iratwe muri rubanda!
 Ivane intama mu isafuriya
 Ikure isake ku isahani,
 1005 Ineshe n'inka yo mu batetsi.
 Amahene yose ave mu bikari,
 Ikube ibyo bihugu ibe icyigenge,
 Ivangwe n'imateko y'imyaka.
 Iyihe kuryohera Abanyarwanda.
 1010 Ni rutsirika bubihe
 Ikabutsura ikabutsinda,
 Ikabutsemba ikabubumba!
 Ni rubumba batetsi
 Rwikunda ku mbehe,
 1015 Rwiganza ku myunyu
 Rwigenga mu bikari,
 Ruhatunga burundu,
 Rwikebera iyo fasi,
 Ikayitunga nk'Umwami,
 1020 Ikahabumba itavuguruzwa!
 Ni ruhonjoka gitware,
 Rwizihirwa n'ibondo,
 Ni impogazi rubunga
 Ya rutengerana ngingo
 1025 Invuruga-bisogororo
 Ya rusaga sorori;
 Ni inyumba rwabunga
 Ya ruvonyeza-bijumba!
 Ni ruteturura abagore b'impumbu,
 1030 Rutuburira abibutse gucunda,
 Ruhimbaza abakikije ameza,

- Rusohoka ku isafuriya isaha isohoye
 Rutavugisha impuha abo yaryoheye mbere,
 Rutetereza abiratana inyama zindi,
 1035 Rusendereza amasahani ukabikunda,
 Rukorerwaho imisango y'isabukuru,
 Rutumirirwa Abazungu iyo bava,
 Ruterwa icyunzwe cy'uburyohe.
 Rwinopforwa n'abahinyura ibindi,
 1040 Rubahaga umubyimba ukaguka,
 Rubatera umudigi nk'uwa nyamaturi
 Ubwo yaturutiye iz'amashyamba,
 Ikaba inaturuka kure h'ishyanga,
 Ndariyibanje izina ry'ingurube
 1045 Izajye iratirwa aho yabazwe:
 Yitwa "Indyohesha-birayi!"

AMAHAMBA Y'ABUNGERI B'INGURUBE

Inzovu y'urwijiji rukabije ubujorojoro
 Iya rujegeza-bijumba rwa semitabo,
 Noneho amavubi arayarika mu bikobokobo,
 Kira nyumba ya rukara rwa Majoro!

Rujugitira-bijumba rwa njunditse ibika,
 Invubu y'icyagane ya ruhungabanya-bitebo,
 Isigaye itengerana umuraru wose ugatigita
 Ikaba iya Rutare rwa SOMUKI i Rutongo!

Kivurivuri cya ruvungura-byavu,
 Imbona-bake ya ruhingitirana-mubiri,
 Ni ikitayega zishokanye umunihiro,
 Ikaba iya Rukara rwa MINETE!

Ruhiniriza-kibero rwa sendahiriye,
 Karisimbi k'amatungo ka ruhonjokerana,
 Iyo basigaye bitiranya na ruva-kwaya,
 Ikaba iya Rutare rwa Muganga.

Umuduga uhetse umubyibuho wa ruzimiza-mbavu,
 Imponjoke yagurirwa amarembo ya ruhimbaza-barebyi
 Isigaye ikinana ibicece mu icongori ry'ibifungo:
 Ikaba iya rukara rwa Kurimpuzu, nzayibaga!

Gihirihiri cya ruhingika-bondo,
 Inyumba irangwa n'umubyibuho ya ruvonyeza-bijumba,
 Isigaye ibunda mu byambu ikabigomera:
 Iba mu ngoro mu Rukari, aho zogerezwa isahani!

Gihiringitirane cyashiriyemo umurizo,
Mavuta-mingi ya rutenga-bondo,
Iyashinganywe n'abategeka-birori ba Leta,
Ifungiyeye i Rwinkwavu kwa Sovanye

Rubyagira-nzira rwa ndanze guhigama,
Intamati yamazwe ubwoya no kuneta ya rubyimbabyimba,
Iyo bakekaga umwingo ikarushya abasuzumyi,
Izigamwe na Misiyoni iruhande rw'ifumbira!

Yemwe ga bana baragiye mu bishanga,
Mureke zirenze imijumbajumba n'isayo,
Nizihaga zihundagarire mu bizenga:
Zidashongesha amavuta yo gukaranga ibirayi.

Kamena niboneka ntibahute kuzamburira,
Ahanini muri hoteri harazishaka;
Zirahaka amanoti n'ibikoroti mu mabondo,
Nicyo abasirimu bazikundira murakenge!

Kuyavuga si ko kuyarangiza inyuma:
Uwarata intendeza-matwi yakesha amajoro!
Za runihira zishoka nk'imvura y'umuhindo
Impini igaturika zikwira ibishanga.

Nimugwire Bikoko by'imva-burayi
Nimutungwe isanzure ntimukinenwa!
Nimutebanwe akamaro n'ibinyamahembe
Mubyirukane n'amajyambere y'u Rwanda!

IBISOBANURO

1. Umutware w'Uruyange yari Fransisko Rwabutogo. Ingabo z'Uruyange zari zararemwe na Rugaju rwa Butimbo ku ngoma ya Yuhi IV Gahindiro. Uwo Mutwe w'Ingabo wagenanaga n'Umutwe w'Inka witwaga Ingeyo, zororaga Inyambo.
2. Rwabiga: ni izina bahimbye intare mu bihugu byegereye amashyamba zibamo.
3. Ingeyo ni wa Mutwe w'Inka wari utunzwe n'Ingabo z'Uruyange.
4. Imyinjiro: ni ingombe nyinshi zo mu kiraro cy'inka kimwe. Iyo amashyamba menshi y'umutegetsi umwe yabaga aragiye mu karere kamwe, bazubakiraga ikiraro kimwe,

ariko bakagisaturamo ingombe nyinshi, buri bushyho bukarara mu ngombe bwagenewe. Izo ngombe zo mu kiraro kimwe zitwaga imyinjiro.

5. Urwamururo: ni impigi yabaga ikozwe nk'ifirimbi, maze abashumba baba bikanze ko intare ibateye, bakaruvuza: ni byo kwamurura. Igihe bavuzura urwamururo bagenda banyuzamo aya magambo bati: Agatwe irya, akabuno ino! Ubusururuke ku kiryamo, ubute mu ijanja! Birumvisha abatari babizi bo mu gihugu rwa gatati, impamvu yo kuvuga ko uwo munyarwamururo yagize ubwoba bumutera guteshaguzwa, aho kuyibwira amagambo ayigizayo, yayibwiraga ayo kuyihamagara ngo ize imwerekeraho.

6. Urukunga: ni uruhange rw'umuharuro ruteganye n'irembo ry'urugo. Bashakaga ko ingurube iva hafi y'imyugariro.

7. Umuhuhozi zari Umutwe w'Inka wagenanaga n'Umutware w'Ingabo zitwaga Abashakamba; iyo Mitwe yombi yaremwe na Yuhi IVGahindiro.

8. Aloyizi Semutwa yari Umutware w'Imvejuru; Ildefonsi Mutembe yari Umutware wa Nyakare. (Reba mu ndunduro lisiti y'Amaprovinci muri Teritwari zayo.)

9. Owaliidi Sendashonga yari Umutwarwe wa Nyaruguru.

10. Itariki: wari umunsi w'Ikoraniro ry'Abatware n'Abashefu babo batumiwe na Bwana Administrateri wa Teritwari, kugira ngo ababwire ibyo bagomba gukoresha. Itariki yabaga buri kwezi.

11. Bitungangando: ni izina ry'ubunini bari barahimbye Padri Van Uden. wari Umunyabintu b'Iseminari ya Nyakibanda. Iryo zina ryari ryaravuye ku mugabo wo mu bya Rwamagana wari munini biteye ubwoya.

12. Abadatorwa: abadasoreshwa, ntibabazwe imirimo na Leta; bivuga Abapadir.

13. Ladislasi Haguma yatwaraga Amarangara.

14. Isabukuru: Umunsi Mukuru w'Ububirigi (21 Nyakanga).

15. Ku Ruyenzi: agahugu ka Provincsi ya Rukoma hari hagati ya Kamonyi na Nyabarongo.

16. Atanazi Kanimba: yatwaraga Provincsi ya Nduga.

17. Alfonsi Mfizi yatwaraga Provincsi ya Rukoma.

18. Semugeshe yatwaraga Ubufundu.

19. Ludoviko Rwitsibagura yatwaraga Ubuyenzi.

20. Leonardi Birasa yatwaraga Ubunyambiriri.

21. Eduwaridi Rwampungu yatwaraga Ubumbogo.
22. Deogratias Muterahajuru yatwaraga Nyantango.
23. Paulo Nturo yatwaraga Akabagari.
24. Rwubusisi yatwaraga Uburiza na Buganza-Sud.
25. Rafaeli Serukenyinkware yatwaraga Ubwishaza.
26. Simoni Nyiringondo yatwaraga Mirenge.
27. Godifridi Kamunzini yatwaraga Ubugoyi.
28. Fransisko Rwabutogo yatwaraga Ubuganza bwa Rwamagana.
29. Stanislasi Rutsinga yatwaraga Ubuganza-Est.
30. Thomasi Karyabwite yatwaraga Ububeruka.
Epafroditi Kalima yatwaraga Kibari-Buberuka.
31. Nepomuseni Rwaburindi yatwaraga Buhoma-Rwankeri.
Berkimansi Rwabukamba yatwaraga Ubugarura.
Kwintiri Bisamaza yatwaraga Bukamba-Ndorwa.
32. Kaniziyo Bisarinkumi yatwaraga Ubukonya.
33. Nepomuseni Ntaganda yatwaraga icyesha.
34. Wilibrordi Rwamuningi yatwaraga icyingogo.
35. Fransisko Nzaramba yatwaraga Ubusanza-Sud.
36. Fransisko Nyangezi yatwaraga Ubushiru.
37. Dyoniziyo Mbaraga yatwaraga Akanage.
38. Mikayire Rwiyamirira yatwaraga Ubwanacyambwe.
39. Sitefano Gitefana yatwaraga Ubukunzi-Busozo.
40. Yozefu Bideri yatwaraga Impara.
41. Stanislasi Kalisa yatwaraga Ubuganza-Rweya.
42. Antoni Kanyangira yatwaraga Migongo.

43. Mikayire Rutaremara yatwaraga Ubuganza-Nord.
44. Proyegiti Fundi yatwaraga Rusenyi-Itabire.
45. Karoli Rubayiza yatwaraga Ubudaha.
46. Yozefu Rutamu yatwaraga Bashumba.
Yustini Gashugi yatwaraga Buhanga-Ndara.
47. Krispini Kamali yatwaraga Umulera.
48. Selestini Mukarage yatwaraga Amayaga.
49. Faustini Gacinya yatwaraga Gihunya.
50. Deogratias Kaberuka yatwaraga Ndiza.
51. Teodori Muregancuro yatwaraga Ndorwa I Ouest.
Krizostomo Katarwa yatwaraga Ndorwa II Est.
52. Medardi Kanubana yatwaraga Buganza-Nord.
53. Imisoto: bibwira ko uwaguye ivutu arivurwa no gucishwa mu misoto.
54. Gerardi Ruhorahoza yatwaraga Ubugesera.
55. Godifridi Butare yatwaraga Urukaryi.
56. Fideli Kataba yatwaraga Umubari.
57. Sitefano Rwigemera yatwaraga Urukiga.
58. Impumbu: bivuga abagore binywera amata gusa bakibagirwa gucunda.
59. Bavugaga ko Umuzungu uriye ingurube wenyine, atayitumiriye abo baturanye bose, ngo bamucaga, bakamuvana mu bandi.

ZA PROVINSI MURI TERITWARI KU MURONGO

Abatware tumaze kuvuga mu bisobanuro, ni abariho mu wa 1941-1942. Nyuma y'ubwo, Provinsi zimwe zagiye zomekwa ku zindi, kandi Abatware bamwe basimburwa n'abandi. Ni ukuvuga rero ko hagati ya 1943 na 1959 bitari bikimeze na gato nk'uko twabivuze. Muri twe hari benshi batamenye abo Batware twavuze, bakaba baramenye ahubwo abandi tutavuze.

Noneho rero dukurikiranye ayo mazina ku murongo muri buri Territwari, kuko ibingibi byose ari ibitekerezo by'u Rwanda rw'icyo gihe:

I. Teritwari ya Kigali.

1. Ubwanacyambwe: Mikayire Rwiyamirira.
2. Uburiza na Buganza-Sud: Rwubusisi.
3. Ubumbogo: Eduwaridi Rwampungu.
4. Ubugesera: Gerardi Ruhorahoza
5. Ubuganza-Est: Stanislasi Rutsinga.
6. Ubuganza-Nord: Medardi Kanubana.
7. Urukaryi: Godifridi Butare.

II. Teritwari ya Kibungo.

1. Igihunya: Faustini Gacinya.
2. Ubuganza: Fransisko Rwabutogo.
3. Ubuganza-Rweya: Stanislasi Kalisa.
4. Migongo: Antoni Kanyangira.
5. Mirenge: Simoni Nyiringondo.
6. Umubari: Fideli Kataka.

III. Teritwari ya Byumba.

1. Urukiga: Stefano Rwigemera.
2. Ubugeruka: Tomasi Karyabwite.
3. Ubuyaga: Medardi Munyaneza.
4. Umutara: Gervazi Lyumugabe.
5. Ndorwa I Est: Krizistomo Katararwa.
6. Ndorwa II Ouest: Teodori Muregancuro.

IV. Teritwari ya Ruhengeri.

1. Umulera: Krispini Kamali.
2. Ubugarura: Y. Berkimansi Rwabukumba.
3. Ubuhoma-Rwankeri: Y. Nepomuseni Rwamurindi.
4. Ubukamba-Ndorwa: Kwintiri Bisamaza.
5. Ubukonya: Kaniziyo Bisarinkumi.
6. Kibali-Buberuka: Epafroditi Kalima

V. Teritwari ya Gisenyi.

1. Ubugoyi: Godifridi Kamuzinzi.
2. Ubudaha: Karoli Rubayiza.
3. Ubushiru: Fransisko Nyangezi.
4. Ubwishaza: Razaeri Serukenyinkware.
5. Akanage: Diyoniziyo Mbaraga.

6. Cyingogo: Wilibrordi Rwamuningi.

VI. Teritwari ya Nyanza.

- | | |
|-------------------|--------------------------|
| 1. Ubusanza-Nord: | Mikayire Rutaremara. |
| 2. Amarangara: | Ladislasi Haguma. |
| 3. Amayaga: | Selestini Mukarage. |
| 4. Ndiza: | Deogratias Kaberuka. |
| 5. Nduga: | Atanazi Kanimba. |
| 6. Nyantango: | Deogratias Muterajejuru. |
| 7. Rukma: | Alfonsi Mfizi. |
| 8. Bunyambiriri: | Leonardi Birasa. |
| 9. Kabagari: | Paulo Nturo. |

VII. Teritwari ya Astrida (Butare kuri ubu)

- | | |
|-------------------|------------------------|
| 1. Mvejuru: | Aloyizi Semutwa. |
| 2. Buhanga-Ndara: | Yustini Gashugi. |
| 3. Bufundu: | Semugeshi. |
| 4. Busanza-Sud: | Fransisko Nzaramba. |
| 5. Buyenzi: | Ludoviko Rwitsibagura. |
| 6. Nyakare: | Ildefonsi Mutembe. |
| 7. Bashumba: | Yozefu Rutamu. |
| 8. Nyaruguru: | Oswaldi Sendashonga. |

VIII. Teritwari ya Cyangugu.

- | | |
|---------------------|-------------------------|
| 1. Impara: | Yozefu Bideri. |
| 2. Abiru: | Leonidas Biniga. |
| 3. Bukunzi-Busozo: | Stefano Gitefana. |
| 3. icyesha: | Y. Nepomuseni Ntaganda. |
| 4. Rusenyi-Itabire: | Proyegiti Fundi. |

Murabona ko rero icyo igihe Teritwari ya Kibuye na Teritwari ya Gitarama zari zitararemwe. Abatware tutavuze ahangaha, abenshi mu Basomyi bakaba bakaba baramenye gusa abandi tutavuze, impamvu ni ukwo abatavuzwe bari bataragabirwa Ubutware mu myaka ya 1941-1942.
